

**Kalaallit Nunaanni folkehøjskolit pillugit Inatsisartut inatsisissaattut siunnersuut**  
(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

**Saqqummiussissut**

**Siullermeerinnineq**

Naalakkersuisut sinnerlugit matumuuna folkehøjskolit pillugit Inatsisartut inatsisissaattut siunnersuut saqqummiutissavara.

Inatsisartut inatsisissaattut siunnersuummi pingaarnertut siunertarineqarpoq ilinniartitaanerup qaffasissusia qaffassarniarlugu ilungersuuteqarnermi sullissiveqarnikkut atugassarititaareersut tamarmik atorluarneqarnissaat. Taamaattumik siunnersuut folkehøjskolit siunertamik aalajangersaavigineqarnerisa annertusarneqarnissaannut tunngasorujussuuvoq. Tamatuma kingorna folkehøjskolit ilinniartitaanermut suliniarnermi ilanngutsinneqarsinnaapput, tamannalu maanna malittarisassat atuuttut naapertorlugit pisinnaanngilaq.

Siunnersuuteqarnikkut inatsisitigut tunngavigisat pisariaqartinneqartumik eqaallisinneqassapput, taamaalilluni folkehøjskolit ilinniartitaanermut suliniarnermi nalinginnaasumi ingerlatseqataasut ilanngunneqarsinnaanerulersillugit. Tamanna højskolit nerisaqarfiutigalugu atuarfittut ingerlasuunerannik immikkut iluaquteqarluni pissaaq. Atuartitsinerup saniatigut atuartut akornanniinnaanngitsoq aammali atuartut ilinniartitsisullu akornanni najortigiittoqartarpoq. Avatangiisit ilikkagaqarfusut inuusuttunik ilinniakkamik piginnaasaqalerfiusumik aallartitaqarsimanngitsunik kiisalu ilinniarnermi avatangiisit nalinginnaasut aallaavigalugit taamatut aallartitsigallarnaviarunangitsunik pilerilersitsiviusinnaasut pineqarput.

Taamaattumik maanna malittarisat killeqartitsinerat nassuerutigalugu højskolit maanna annikillisaanerit pinnagit piginnaasaqalerfiusumik atuartitsinivimmik neqerooruteqarnissamut periarfissinneqarnissaat siunnersuutigineqarpoq. Tamatuma piginnaasanik ineriartortitsinissamik ilinniartitaanissamillu pisariaqartitsineq atugassarititaareersuni matussuserneqarsinnaatinnagu højskolit ikiuuttarnerisigut pinissaa siunnersuutigineqarpoq. Tamatumunnga atatillugu erseqqissaatigineqassaaq folkehøjskolit piginnaasaqalerfiusumik atuartitsinermik neqerooruteqarnerat ilinniarfimmik allami nalinginnaasumik pisaraluartoq ilinniarfimmik pineqartumik atuartitsinermik pineqartumik suliassaqartuusumik suleqateqarluni pissammat. Taama iliornikkut folkehøjskolit ilinniarfiillu pisortatigoortumik ilinniartitsiviusut akornanni suleqatigiilernissamut periarfissat erseqqissarneqassapput.

Tamatatumunnga peqatigitillugu erseqqissaatigineqassaaq højskolit maanna kultur, kinaassuseq inuttullu ineriartorneq piginnaasaqalerfiusussaangitsoq sammillugu nalinginnaasumik højskolertarnermik neqerooruteqarnerisa sunnerneqarnissaat siunnersuumi siunertaanngimmat, taamaalilluni højskolit ingerlatsinerat atuinneqassalluni pingaarnertullu ingerlataaginnassalluni.

Naalakkersuisut naalakkersuisooqatigiinnissamik isumaqatigiisummi allassimasutut pingaartippaat kinaluunniit ilinniarusuttoq aamma tamatumunnga periarfissaqassasoq. Siunnersuummik taassuminnga atuutilersitsinikkut ilinniartitaanermi toqqagassaareersut pingaarutilimmik ilaneqarnissaannut tunngavissaqalissaaq Naalakkersuisullu neriutigaat tamatuma inuusuttut suli amerlanerusut ilinniakkaminik aallartittarnerat nassatarissagaa.

Naggasiutigalugu ilisimatitsissutigineqassaaq Namminersulernerup kingunerisaanik siunnersuut inatsisilerinikkut najoqqutassat atuuttut innersuussutigalugit inatsisartut peqqussutaannut atuuttumut allannguutissatut siunnersuutitut pinnani inatsisartut inatsisissaattut siunnersuutitut suliaammat.

Taamatut oqaaseqarlunga siunnersuut Inatsisartunut akuersaartumik suliassanngorlugu ingerlateqqippara.